

■ GLOSSA

Circumcisiun. Surtagliada.

Beschneidung

DA SILVIO CAMENISCH

Betg adattà per sensibels. Stoss jau betg avair legi, na poss betg vertir. Jau sun mez responsabel. Qua sun jau mez il retg. Jau sun (pre-) avertì. Grazia.

Jau hai in nunditg conflict da conscienza, ed avess ina dumonda als ortodox da noss lungatg matern, ma era da la chara lingua da la mamma. Stoss jau schon ma laschar circumcisar stringentamain en il proxim temp, vi jau daventar detg member? Jau hai schon in dretg member, quel è schon endretg, ma betg circumcisà endretg: enturn ed enturn. Il linguatg è bler dapli che infurmaziun, è persvasiun e confessiun e religiun. Linguatg è divin. Jau i na sun betg, divin. Quai che n'è betg po anc daventar, richtig: Jau stoss ma laschar circumcisar (dal lat. circumcido, tagliar enturn radund) u da bab Abraham sez u in elegi da sia schlatta.

Sche tuts e tuttas vulan (vultan), vi jau er. Romontsch è er mia sort, mia mort, mes trument! Grazia. Jau na less betg ristgar da

vegnir truà a la mort, senza spendrament! Sco in da quels dal «Newspeak», da la «Tschontscha nova» na merit jau betg el, il spendrament (Heil, Erlösung). En mia naira miseria ma lasch jau tagliar il meglier al dretg lieu il dretg temp la dretga persuna, claro, jau na stun betg si ma defend, resguard pretend. Jau mord sin in toc lain avant e durant la surtagliada, la mazzacrada. I curra er sang. Fa quai fitg mal? Mia peletta, jau hai mo ina, sto davent; pront davent jau dretg member da la vegliurda schlattaina d'Abrahams Muoths Lansels Vielis... ah, Vus savais schon.

Sacra mazzacra, stoss jau, Sda detschert, ma laschar tagliar davent la peletta da mes member, signur vegl derschader federal anc fitg activ, vi jau survegnir in num, sto gea betg esser da pum, mes num, ed esser recepì sco dretg member? Jau hai mo ina peletta, betg gist in mund entir; duas u trais pels n'hai jau betg sco nus chatschaders da vulps. O libra libra paupradad (vardad? democrazia? er egal) na dastg jau betg salvar mia unica peletta, e tgenina! lessas guardar ella? Tge fa-

schain nus cun quella, ina giada circumcisada cun la nizza u tge adina? È per las vulps, betg?

Jau stoss unfrir stringentamain e ritualmain mia peletta, ma stoss laschar scuvrir mes unic glogn durabel, nachhaltig, per daventar dretg member? Uschè donn. Mes glogn è lura sensibel, jussas tgenin sensibel, immediat cunauras e tussuna. Il Voss er? Navair schon er? È mes glogn strusch scuvert betg immediat preda libra, selvaschina, insaco? Nus faschain vinavant circumcisiuns, ad interim, en noss spital regiunal Glion? Nus na faschain betg in stop, in moratorium? Ta laschas ti vegl derschader federal anc fitg fitg activ far l'emprim, ed i gartegia, ma lasch jau er. Ensemen essan nus curaschus.

Stoss jau schon tagliar Scurt stringentamain ritualmain mes pastget davant chasa u dastg jau? Tge di la lobbista advocata dals pastgs? Stoss jau bandunar mes lieu d'Origen, na fatsch jau betg quai ch'è da far? Muss ich denn muss ich denn zum städtele hinaus...